



# Fundarsköp bæjarstjórnar Reykjavíkur 16. Janúar 1931

---

Bjarni Benediktsson – Stjórnsmál – Bæjarstjórn Reykjavíkur - Fundarsköp

Tekið af vef Borgarskjalasafnsins

---

[bjarnibenediktsson.is](http://bjarnibenediktsson.is)

Einkaskjalasafn nr. 360  
Stjórnsmálamaðurinn  
Askja 2-1, Örk 1b

©Borgarskjalasafn Reykjavíkur

# Fundarsköp

## bæjarstjórnar Reykjavíkur

Gilda frá 16. janúar 1931.

Prentsmiðjan Acta 1931

## Fundarsköp

### bæjarstjórnar Reykjavíkur

#### 1. gr.

Bæjarstjórn Reykjavíkur er skipuð 15 kjörnum bæjarfulltrúum. Þeir ræða og gera ályktanir um bæjarmálefni á bæjarstjórnarfundum.

„Fundarmenn“ tekur í fundarsköpum þessum til bæjarfulltrúa og borgarstjóra.

#### 2. gr.

Ár hvert í febrúarmánuði kýs bæjarstjórn forseta sinn og 2 varaforseta úr flokki bæjarfulltrúa.

Sá er rétt kjörinn forseti, sem fær meiri hluta atkvæða bæjarfulltrúa, sem á fundi eru. Nú fær enginn svo mörg atkvæði, og skal þá kjósa að nýju óbundinni kosningu. Ef enginn fær þá næga atkvæðatölu, skal kjósa um þá tvo, er flest fengu atkvæði, og ef tveir eða fleiri, sem um skyldi kjósa, hafa fengið jafnmörg atkvæði, þá skal varpa hlutkesti um það, um hverja tvo skuli kjósa. Ef enn fær hvorugur þeirra meiri hluta, þá skal sá vera forseti, er fleiri

atkvæði fær. En ef þeir fá jafnmörg atkvæði, ræður hlutkesti, hvor skuli vera forseti.

Með sama hætti skal kjósa varaforseta. Þeir skulu gegna forsetastörfum, ef forseti forfallast eða hans missir við, með öllu, unz kosinn er nýr forseti.

### 3. gr.

Bæjarstjórn kýs sér tvo skrifara og tvo varaskrifara úr sínum hóp til árs og á sama fundi sem forsetakosning fer fram. Skrifara skal kjósa hlutfallskosningu.

### 4. gr.

Forseti stjórnar fundum bæjarstjórnar. Hann sér um, að allt fari reglulega og skipulega fram, og eru bæjarfulltrúar og borgarstjóri skyldir að hlýða úrskurðum hans um allt, er varðar fundarsköp. En skjóta má úrskurði hans undir úrlausn bæjarstjórnar, ef vafi leikur á um skilning fundarskapa.

### 5. gr.

Skrifarar skulu telja saman atkvæði, þegar atkvæðagreiðslur fara fram og þegar kjósa skal nefndir eða menn til starfa annars. Bæjarstjórn ræður og sérstakan fundarskrifara utan bæjarstjórnar, sem halda skal gerðabók undir eftirliti skrifara bæjarstjórnar. Í fundarlok skal lesa upp gerðabók, og skal forseti undirrita hana og aðrir viðstaddir bæjarfulltrúar. Fundarmenn eiga heimting á því, að bókaðar verði athugasemdir þeirra í gjörðabók, ef þeim þykir þar eitthvað rangt bókað eða ónákvæmt, svo og stuttlega um ágreiningsatkvæði sín.

### 6. gr.

Nefndir til þess að starfa að einstökum málum, hvort sem þær eru fastanefndir eða lausanefndir, og bæjarráð skal kjósa hlutbundnum kosningum eftir aðferð þeirri, sem kennd er við de Hondt. Sérhver bæjarfulltrúi er skyldur að taka sæti í bæjarráði og hverri nefnd, sem hann er löglega kosinn í. Sá, sem fyrstur er kosinn á lista, kallar nefnd saman fyrsta sinni og lætur kjósa formann. En hann lætur því næst kjósa skrifara. Um leið og nefnd lýkur störfum, getur hún, eða, ef hún er klofin, hvor hluti hennar, kosið sér framsögumann.

Skrá um nefndir og bæjarráð skal festa upp í fundarsal bæjarstjórnar.

### 7. gr.

Reglulega fundi heldur bæjarstjórn fyrsta og þriðja fimmtudag hvers mánaðar kl. 17, ef mál eru fyrir hendi, og stendur fundur svo lengi sem þörf gerist, þó ekki lengur en til miðnættis. Bæjarstjórnin getur þó ákveðið að fella niður fundi í júlí og ágústmánuðum. Ef fundur ferst fyrir vegna helgi eða af öðrum orsökum, skal hann halda næstu virka daga.

Aukafundi skal halda, þegar borgarstjóri eða bæjarráð eða ef 5 bæjarfulltrúar æskja þess. Borgarstjóri ákveður stað og stund til aukafundahalds.

### 8. gr.

Borgarstjóri semur dagskrá handa bæjarstjórnarfundum. Hvert það bæjarmál, er bæjarráð, nefnd eða

bæjarfulltrúi krefst, að tekið sé á dagskrá, er skylt að taka á hana. Þó má borgarstjóri ekki taka á dagskrá nokkurt málefni til meðferðar á reglulegum fundi bæjarstjórnar, nema það sé komið til hans fjórum nóttum fyrir fund. Í síðasta lagi kl. 16, tveimur dögum fyrir reglulegan fund, skal hann hafa sent öllum fulltrúum dagskrá, þar sem til sé tekin þau mál, sem koma skulu til umræðu. Ef leggja skal fram fundargjörð bæjarráðs eða nefndar, þá skal eftirrit fundargjörðar fylgja dagskránni. Önnur mál en þau, sem á dagskrá standa, mega ekki koma til umræðu á fundum bæjarstjórnar.

Dagskrá bæjarstjórnarfunda skal festa upp í fundarhúsi bæjarstjórnar áður en fundur er haldinn.

Mál skulu afgreidd í þeirri röð, sem í dagskrá segir, nema meiri hluti bæjarfulltrúa óski röð breytt.

#### 9. gr.

Borgarstjóri á samkvæmt embættisstöðu sinni sæti á fundum bæjarstjórnar og má taka þar til máls svo oft sem hann vill, en gæta skal hann fundarskapa. Ekki á borgarstjóri atkvæðisrétt, nema hann sé jafnframt bæjarfulltrúi.

#### 10. gr.

Bæjarstjórnin afgreiðir mál með einni umræðu, nema hún ákveði öðruvísi um einstök mál eða til-laga feli í sér heimild eða skipun um fjárgreiðslu úr bæjarsjóði eða hafnarsjóði. Skal þá hafa tvær umræður.

#### 11. gr.

Sérhver fundarmaður getur borið upp breytingar-tillögur og viðaukatillögur við hvert það málefni, sem til umræðu er. Skulu slíkar tillögur vera skriflegar, en veita skal forseti fundarmönnum ráðrúm til þess að semja þær. Forseti sker úr því, hvernig atkvæða-greiðslu um tillögur skuli haga.

#### 12. gr.

Bæjarstjórnarfundi skal halda í heyranda hljóði. Ef áheyrendur eru ekki kyrrir og hljóðir eða trufla fund með nokkrum hætti, þá getur forseti vísað þeim út og ef þörf gerist, látið ryðja áheyrendasalinn.

Skylt er þó að ræða mál fyrir luktum dyrum, ef það varðar einkalífnað manna. Svo getur fundarmaður annars krafizt þess, að mál verði rætt fyrir luktum dyrum, og sker bæjarstjórn úr því umræðulaust með meiri hluta atkvæða, hvort mál skuli rætt opinberlega eða fyrir luktum dyrum. Enginn má skýra frá umræðum í málum, sem rædd eru fyrir luktum dyrum.

#### 13. gr.

Ekki getur bæjarstjórn gert ályktun um mál, nema meira en helmingur bæjarfulltrúa sé á fundi og greiði atkvæði.

Afl atkvæða ræður úrslitum mála. Ef atkvæði eru jafnmörg með tillögu og móti, telst hún fallin, nema kosning sé til nefndar eða í bæjarráð. Þá ræður hlutkesti.

Um kosningu borgarstjóra og í stöður þær, er bæj-

arstjórn veitir, fer sem um kosningu forseta bæjarstjórnar.

Mál má afgreiða með því að samþykkja það eða fella, með því að vísa því frá með einfaldri eða rökstuddri dagskrá eða með því að fresta því.

14. gr.

Fundarmaður, sem taka vill til máls, skal snúa sér til forseta. Leyfir hann mönnum venjulega að taka til máls í þeirri röð, er þeir hafa kvatt sér hljóðs. Þó má hann breyta út af því um borgarstjóra og framsögumann, sem og til þess, að ræður skiptist jafnt með og móti málefni, eða til þess að bæjarfulltrúi geti gert stutta leiðrétting eða athugasemd, er varðar sjálfan hann. Ef tveir eða fleiri kveðja sér samtímis hljóðs, þá ræður forseti, í hvaða röð þeir tala.

15. gr.

Flutningsmaður máls eða framsögumaður mega tala þrisvar við hverja umræðu máls, en aðrir bæjarfulltrúar tvisvar. Þó má maður oftara taka til máls til þess að bera af sér ámæli, gera stutta fyrirspurn, athugasemd um atkvæðagreiðslu eða gæzlu fundarskapa. Ræðumaður skal standa við sæti sitt meðan hann flytur ræðu sína.

16. gr.

Ræðumaður skal beina máli sínu til forseta eða fundarins. Eigi má hann lesa upp prentað mál, nema forseti leyfi. Skylt er fundarmönnum að lúta valdi forseta í hvívetna, er gæzlu góðrar reglu varðar.

Ef fundarmaður ber aðra menn brigslyrðum, eða vikur verulega frá umtalsefninu, þá skal forseti víta hann fyrir það, og nefna þau ummæli, er hann vítir. Nú er fundarmaður vittur tvisvar á sama fundi, og má þá forseti, með samþykki fundarins, svifta fundarmann málfrelsi á þeim fundi. Ef fundarmaður hlýðnast ekki úrskurði forseta eða ef almenn óregla kemur upp á fundi, skal forseti fresta fundi um stundarsakir eða slíta fundi alveg, ef honum þykir nauðsyn til bera.

17. gr.

Ef umræður dragast úr hófi fram, getur fundarmaður stungið upp á því, að þeim sé hætt, og sker fundur þegar í stað úr því umræðulaust. Skal þá jafnan ákveðið, hvort þeim skuli leyft að tala, er kvatt höfðu sér hljóðs áður en tillaga um að slíta umræðum kom fram.

18. gr.

Atkvæðagreiðsla fer þannig fram, að fulltrúarnir rétta upp hægri hönd sína. Nafnakall skal þó hafa. ef 4 fulltrúar hið fæsta krefjast þess og ef forseti virðist ekki mega glöggjt ráða af atkvæðagreiðslu um málsúrslit. Við nafnakall greiða bæjarfulltrúar atkvæði eftir prentaðri skrá, þar sem nöfn þeirra eru í stafrófsröð, og skal hlutkesti ráða, á hverjum skuli byrja. Bæjarfulltrúa er skylt að greiða atkvæði við nafnakall, nema hann leiði rök að undanfærslu sinni, er forseti tekur gild, enda er bæjarfulltrúa rétt að

skjóta úrskurði forseta til fundarins, sem sker þá umræðulaust úr því máli.

19. gr.

Bregða má af fundarsköpum þessum eftir uppástungu forseta, borgarstjóra eða 2 bæjarfulltrúa, ef borgarstjóri samþykkir, enda samþykki að minnsta kosti  $\frac{2}{3}$  þeirra bæjarfulltrúa, sem á fundi eru.

20. gr.

Til breytinga á fundarsköpum þessum þarf umræður á tveimur bæjarstjórnarfundum, meiri hluta greiddra atkvæða og staðfestingu ráðherra.

---

Þannig samþykkt á fundi bæjarstjórnar 20. nóvember 1930, og staðfest af atvinnu- og samgöngumálaráðuneytinu 16. janúar 1931.

Borgarstjórinn í Reykjavík, 21. jan. 1931.

K. Zimsen.

---